



## فاتن الزغبى

شاعره مصرية لها العديد من المشاركات في الكثير من الجرائد والمجلات، صدر لها ديوان ضفائر النار والندي، وكتاب لبنان الأرز خالد، حكايات الصعاليك وديوان راحلة إلى مدينة الحب

## إنت عارف

انت عارف.. عمري جنبك ما بقى خايف  
كنت حاسس بيك وشايف كل أحلامي ف هواك  
اتسرسبت من بين إديا بس برضو فضلت واقف  
إنت عارف.. طرت أنا لسابع سما  
ولمست بمشاعري النجوم  
كنت ماسك يومها إيدي كنت لامسك  
كنت شايفك كنت حاسك  
طفل دايب ف البراءة  
سبت ايدي فجأة  
بسقط سقطة سقطة  
نقطة نقطة

طفل ساذج صدقك صدق هواك  
طار مع الأحلام معاك  
بس يا خسارة وقع مكسورة روحه  
كل نقطة ف دمه بتقولك كفاية.. إنت صح  
الجروح مردومة ملح.. إنت صح  
عمري جنبك يوم ما حسيت الأمان  
إنت أيه؟ تمثال من الشمع الجميل  
بيشف لونه تخطف الأنظار عيونه  
أما أنا قلب عبادة برئ  
للشمس بيفتح عيونه.. إنت أيه؟  
عمري جنبك يوم ما حسيت الأمان  
ابعد.. خلاص.. إنساني  
سبني لأحزاني  
لأصعب إحساس.. إحساس الوحدة من بعدك  
وأنا وسط الناس حبيته خلاص  
إنت عارف.. عمري جنبك ما ابقى خايف  
كنت مرعوب برتعد  
والنهاردة أنا ح اعلنها صراحة  
إنت برة.. برة عمري.. برة قلبي  
خدت منك استراحة  
كنت جنبك وبصراحة أيوه خايف